

1 PETERE

Peterem dis tcgãyas tc'ãà di sa

Téé-cookg'ai sa

Peterem di ne nxárá-kg'ao ne xg'ao gane di dtcòmàn domka kái xgàrakuan hěé naka xháéan hěéthěé q'oo koe hàna.

Petere ba kò ghùì-ghui tcáo ne, a ko máá, Nqarim nxárá tcg'òóà hãa ne khòè ne e, témé. A ba a kò Jeso Krestem ka tc'ěe-tc'ěe ne, ncěe Gam di x'ooan hěé, naka x'ooan koe tēean hěé, naka Gam di hààn hěéthěé di nqòòan máà nea hãa ba.

Gane di xgàrase ne ko Jesom ka dcěèè. Ncěeta mée ne ma qarika téé naka qáo tcáo. Ncěem nqõóm koe i ko gane di dtcòmàn kúrúa bóòè, igaba ne gha ěem gha Jeso Kreste ba x'áísem cáím ka kãbia máàè e.

Qaa-qaasa kg'uia ne:

- xgàrakua ne
- komsana ne
- tcom-tcomsa
- nqòò sa
- kg'òèa hãa nxõá ne

Tcgãyas q'oo koe hàna zi:

- Nqarim di kgoarakua ne (1:3-12)
- Tcom-tcomsase kg'òèa ne (1:13-2:10)
- Dùú sa mée ne dtcòm-kg'ao ne kúrú xháéan koe ne kò hãa ne (2:11-4:19)
- Cg'áré-cg'aresea ne (5:1-14)

Nqarim di kgoarakua ne (1:1-12)

Tsgámkaguku zi

1 ¹Petere ra a, x'áè úú-kg'aor^a Jeso Krestem di ra, a ra a ko *ncēes tsgāya sa* Nqarim nxará tsg'òóa mááse ne khóè ne góá máá, ncēe tsaj-tsajisea hāa ne, a cg'áè-kg'ao khama x'āèa hāa ne: xg'aekum Ponto dim koe hēé, naka Galatia dim koe hēé, naka Kapatokia dim koe hēé, naka Asia dim koe hēé, naka Bitunia dim koe hēéthéé hāna ne. ²Nqarim Abo ba nxāakamaga q'ana hāase *nxará tsg'òóa mááse tua*, Me ko *Tcom-tcomsam* Tc'ēe ba tcom-tcomsakagu tu u, nxāasega tu gha Jeso Krete ba komsana a Gam di c'áòan cgoa cgáìè ka: Cgómkuan hēé naka tòókuan hēéthéé méé i gatu koe càuse.

Kg'òèas nqòò sa

³Dqòmè méém Nqarim gatá dim X'aigam Jeso Krestem ka Xòò ba. Jeso Krete ba x'ooan koe ghùian kam Gam di kaisa thòò-xama-máákuan ka kábase ábà taa hāa, nxāasega *ta gha* kg'òèas nqòò sa *úú* ka. ⁴Ncēe nqòòan ta úúa hāa, nqarikg'ai koe ta gha q'òò ts'eekg'aian di i, kaà tite, a ts'óó tite, a cg'āa-cg'anasea hāa tite e. *Nqari ba* gaa koe tòóa máá tu ana, ⁵gatu ncēe ko dtcòmān koe guu a Nqarim di qarian ka qāèse qgóó a kòrèè tu, nxāakg'aiga tu gha síí kgoarakuan hòò ka, ncēe gha còò di xu x'áè xu ka tseegukaga x'áìè e.

⁶Ncēe gúúan domka tu ko qāè-tcao, gatà i ga ko ma qaase, xòm x'áè-coa ka tu ga ncēeska tāáka zi kúrúá bóòku-qhàò zi ka tshúù-tcaokaguè igabaga. ⁷Gazi di tsééa ne gatu di dtcòmān tseegu ii sa x'áí si i. Gautan igaba, ncēe gha kaàkaguè, ne gha c'eean cgoa kúrúá bóòè. Gataga méé i dtcòmā tu, ncēe kaisase gautan ka qaa-qaasa a, kúrúá bóòè. Nxāaska tu gha Jeso Krestem ko x'áíè m cárn ka dqòmkuān hēé naka x'áàn hēé naka tcomkuan hēéthéé hòò. ⁸Ncēe bóò Me ta ga tu hāa igaba tu ncāmā hāa ba, ncēe tu ncēeska bóò Me tama igaba tu ko Gam koe dtcòm ba, a tu a x'áàko qāè-tcaoan ncēe kg'ui a nxāèè tite cgoa qāè-tcao. ⁹Gatu dis dtcòmā ko qaa sa tu ko hòò khama, ncēe kgoarakuan gatu di tcáóan di sa.

¹⁰Porofiti xu kò ncēe gatu koe gha hààs cgómkus ka porofita, a xu a kò ncēe kgoarakuan koe tcāà tcáó a qarika qaa a. ¹¹Kúrúá xu kò bóò, dùútsa x'áè ka i gha hàà sa, a i a gha ntama hàà sa. Me kò gaxu koe ko hānam Tc'ēem Krestem di ba x'áèan cookg'ai koe nxāea tseegukagu Krestem di xgàrasean ka, naka xùri gha ko x'áàn ka hēéthéé e. ¹²I kò gaxu koe x'áísea hāa, ncēe zi gúú zi xu tsééa mááse tama, a ko gatua tsééa máá tu u sa; gúú zi èe tu ko ncēeska bírièa zi, èe ne kò èe qāè tchòān xgaa-xgaa tu u x'áè ka, ncēe ko nqarikg'ai koe guu a tsééa óáèam Tcom-tcomsam Tc'ēem ka. Moengelean ga ko ncāmā hāa, ncēe zi gúú zi i ga kò bóò sa.

a 1:1 x'áè úú-kg'ao - Gerika sa ko “apostolo” témé.

Tcom-tcomsas kg'òè sa (1:13–2:10)

¹³Tc'èea tu kg'ónò, naka qgóósea hãa, naka tua gatu di nqòðan cg'oèase úú cgòmkuane koe, ãe tu gha Jeso Krestem kò x'áíse x'aè ka máàè e.

¹⁴Komsanako cóán khama méé tu hëé, naka zi cg'ãè zi tc'èe zi táá tc'ãà-cookg'ai tu u guu, ãe tu kò **Nqari ba** tu c'úùà hãa x'aè ka kg'aia úúà zi.

¹⁵Igaba ãe kò tcii tu um ma tcom-tcomsa ii khamaga ma méé tu ma wèè gúùan ãe tu ko kúrú koe tcom-tcomsa ii. ¹⁶Góásea i hãa a ko máá: “Tcom-tcomsa méé tu ii, Tíí Ra tcom-tcomsa Ra a ke,” témèè khama.

¹⁷Ncèè **Nqarim**, ncèe khòèan tákase xgàra tama, a ko khòèan di zi tséé-kg'ám zi ka khòèan xgàra ba tu kò Abo ta ma tcii ne, méé tu nxãaska **ncèem nqóòmkg'ai koe** tu cg'ãè-khoean khama ma x'ãèas noose Nqari ba q'ádase kg'òè. ¹⁸Q'ana tu hãa, dùús cgoa tu kò kàà hùis kg'òè-kg'áms gatu dis koe x'ámá tcg'òóèa sa, ãe tu kò gatu ka tsgóósea xu koe hòða sa. Seleferan hëé kana gautan hëéthéè khama ii zi gúú zi kaàko zi cgoa tu x'ámá tcg'òóè ta ga hãa, ¹⁹igaba qaa-qaasa c'áðan Krestem di ka a kò ii, ghùu-coam chibi úú tama a q'ano ba. ²⁰Gaam ncèe nxãakamaga nqóòm ko tshoa-tshoases cookg'ai koe kò **Nqarim ka** q'ãaèa ba, igabam kò còo di xu x'aè xu ka hàà x'áfè ba. ²¹Gam koe tu ko guu a Nqarim koe dtcòm, ncèe ko x'ooan koe ghùu Me a x'áàkagu Mea ba, nxãasega i gha gatu di dtcòmãan hëé naka nqòðan hëéthéè Nqarim koe hãa ka.

²²Tseeguan komsana ka tu q'ano-q'anosea hãa, a tu a gatu ka qòesean koe tseegu di ncãmãan úúà, ke tu q'ano-tcáóse qarika ncãmku. ²³Kãbase tu ábàèa hãa khama, kaàkom cgùrim koe guu tamase, igaba kaà tamam cgùrim koe guu a: kg'òèa hãa a chòð tamam kg'uim Nqarim dim koe guu a. ²⁴**Nqarim dis Tcgāyas ko méé a ko máá:**

“Wèém khòè ba dcãan khama ii,
i wèè x'áàn gam di, qãáka di zi x'aa zi khama ii.
Dcãa ne ko c'òò,
i x'aan tcheè,

²⁵igabam ko X'aigam dim kg'ui ba
chòð tamase hãa,”

témé khama. Ncèe ba gaam kg'uim ga me e, ncèe tu kò qãè tchòàn koe guu a xgaa-xgaaè ba.

2 ¹Gaa domka méé tu wèè gúùan cg'ãè koe tcg'òóse, naka táá c'èe koe ga kàaku di ii guu, naka táá qãè khòèan khama ko ma kúrúse guu, naka táá tauku di ii guu, naka gataga táá c'èe koe ga cóèku di ii guu. ²Kãbase ábàèa cóán khama méé tu ii, **Nqarim di** kg'uian di bíian xgónèa a, kàa úú tama a, gaan koe tu gha nxãasega kai a kgoaraè ka. ³X'aiga ba qãè Me e sa tu xãmã hãa ke.

Kg'òèam nxõá ba hëé nakas tcom-tcomsas qhàò sa hëéthéè e

⁴**X'aigam** koe hàà, kg'òèa hãam nxõá ba, ncèe ko khòè ne ka bóòà xguèè, igaba kò Nqarim ka nxará tcg'òóèa ba, a ba a Gam koe qaa-qaasa

ii. ⁵Ke tu gatu igaba kg'òèa nxōán khama ma tshàòè, naka tua **Tcom-tcomsam** Tc'èem dim nquu ba ii, **gaa koe** tu gha tcom-tcomsa xu peresiti xu ii, a ko Tc'èem di zi dàda-mááku zi kúrú, ncèe ko Jeso Krestem koe guu a Nqari ba qāè-tcaokagu zi. ⁶**Nqarim dis** Tcgāyas q'oo koe i ko máá:

“Bòò, Sione koer ko nxōá ba tòò,
nxará tcg'òòèa a qaa-qaasam nxōám tcúú di ba,
me cuiskaga wèém ãe ko Gam koe dtcòm ba,
sau-cgaekaguè tite,”

témèè khama.

⁷Gatu ãe ko dtcòm tu kam ncèem nxōá ba cgáé me e. Igaba ãe dtcòm tama ne **mée ne ncèe kg'uiian komsana, ncèe ko máá:**

“Nxōám ãe tshàò-kg'ao xu ka bóòa xguìèa ba,
nxāa ba tcúú dim nxōá ba kúrú,”

témé e.

⁸Si ko **c'èe koe gaia máá:**

“Ncèe ba nxōá me e khòè ne gha kúrú ne tcgàba ba,
a khòè ne ko cg'áékagum nxōá me e,”

témé.

Tcgàba ne ko, kg'ui ba ne kò ntcoe khama - si nxāa sa tc'èea ne máàèa hàas ga si i.

⁹Igaba tu gatu nxará tcg'òòèa tu khòè tu u, x'aiga tu u, a peresiti tu u, tcom-tcomsas qhàò sa, Nqarim ka q'òòèa tu khòè tu, nxāasega tu gha cgáé zi gúú zi Nqarim di zi xгаа-xгаа ka, ncèe ko ntcúúan q'oo koe tciia tcg'òò tu u a Gam di are-aresa x'áàn koe tciia óá tu u ba. ¹⁰C'èe x'aè ka tu kò khòè tu tama tu u, igabaga tu ncèeska Nqarim di tu khòè tu u; c'èe x'aè ka tu kò cgòmkuhan hòò tama, igaba tu ncèeska cgòmkuhan hòò hàa.

Dùú sa mée ne dtcòm-kg'ao ne kúrú xháéan koe ne kò hàa ne (2:11–4:19)

Nqarim di ne tsée-kg'ao ne khama ma kg'òè

¹¹Ncàm-ncamsa tuè, dàra-kg'aoan hée naka tãá nqóò koe guua khòèan hééthéé khamar ko ma dtcàrà tu u, cg'áè zi tc'èe zi cgàam di zi koe tu gha tcg'òòèe sa, ncèe khòèm di tc'èean cgoa ko x'áàku zi. ¹²Eèta ne ko ma tãá zi qhàò zi di ne cg'áè zi gúú zi ko kúrú tu khòè tu khama ma tshúú kg'uiian gatu ka kg'ui igaba mée tu gatu gane xg'aeku koe qāèse kg'òè, naka ne nxāasega gatu di zi qāè zi tsée zi bóò, naka Nqari ba ãem gha ko hààm cáám ka x'áákagu.

¹³X'aigam **Nqarim** domka mée tu wèè qarian khòèm di koe máàse: x'aiga-dxoom koe ga igaba ncèe tc'amaka hàna ba, ¹⁴kana tc'áà-cookg'aian koe igaba, ncèe gaam ka tsééa tcg'òòèa a, a ko hàà ãe ko chibian kúrú ne xgàra, a i a ãe ko qāèan kúrú ne dqòm. ¹⁵Nqarim di

ncàma ne gatà ii, qãè gúùan kúrúan ka tu gha ãe kóma q'ãa tama a káà tc'ãe khòèan nqookagu. ¹⁶Kgoarasea ne khòè ne khama méé tu ma kg'òè, igaba táá gatu di kgoarasean kúrú naka i *c'ãe* cg'ãèan qàbi tcãá guu; kg'òè méé tu Nqarim di tu tséé-kg'ao tu iise. ¹⁷Wéè khòèan tu tcom. Gatu ka c'èean tu ncàm. Nqari ba tu q'ád. X'aiga-dxoo ba tu tcom.

Krestem dis xgàrakus dis sere-sere sa

¹⁸Qãàn méé i gaan ka q'òðsean wéè tcoman cgoa komsana; ãe qãè a tc'auan koe cúí tamase, igabaga ãe xgára ne koe ga hëéthëé e. ¹⁹Ncèè c'èem khòèm kò Nqari bam máàsea hãa domka káà chibise xgàràè, a ba a qád tcáo ii, nem gha *Nqari ba* dqòm me. ²⁰Ncèè chibian tu kò kúrú a ko gaan domka xg'ámme, a tu a qád tcáo ii ne tua gha gaan domka dqòmme? Igaba ncèè qãèan kúrú domka tu kò xgàràè, a gaan koe qád tcáo ii nem gha Nqari ba dqòm tu u. ²¹Ncèes gúús domka tu kò tciiea, gatagam kò thëé Kreste ba gatu domka xgàràè khama, sere-sere sam kò guua máá tu u, nxãasega tu gha xùri dàò Me ka,

²² “cúí chibi ga kúrú tama ba,

i ko táá cúí kàaku ga kg'áma ba koe tcg'oa.”

²³Eëm kò còèè kam kò táá còèkuan kàbia máá ne, a ba a kò èem kò xgàràè ka táá birí ne, kàbisem gha a hàà xgàra ne sa, igabam kò ãe ko tchànose xgàra Mem koe máàse. ²⁴Gam ncèè kò gatá di cg'urian tc'áróa ba ka *xgàu* hiis koe xgàma hãa ba, nxãasega ta gha cg'urian x'óóa máá, a ta a gha tchànoan kg'òèa máá ka. Gam di chibian ka tu kg'òèkaguèa hãa. ²⁵Hoàko zi ghùu zi khama tu kò ii, igaba tu ncèeska gatu ðim Kòre-kg'aom koe kàbisea hãa khama, Q'òé-kg'aom gatu di tc'èean di ba.

Khòè zi hëé naka khòè xu hëéthëé e

3 ¹Khòè saoè, gaam dàòm cúím kaga méé sao gasao di xu khòè xu máàse. Ncèè cúí-kg'áia xu ga kò *Nqarim ðim* kg'ui ba dtcòm tama ne, xu ga nxãaska káà kg'uisse gaxu di zi khòè zi di kg'òðan ka kúrúè a dtcòm, ²ncèè nta sao ko ma *Nqari ba* q'ád a tcom-tcomsa ii sa xu kò bóò ne. ³Gasao di t'òèan méé i tc'áróa sao ka tchàa koe táá guu, tóróèa c'òðan hëé, naka gautan cgoa kúrúèa gúùan hãa di hëé, naka *t'òè* qgáian hãan ka hëéthëé koe. ⁴Igaba méé sao tcáoá sao q'oo koe t'òè sao ii, t'òèan chòð tama a, qãè a tc'aua tc'èean di i, ncèè Nqarim tcgái q'oo koe kaisase qaa-qaasa a. ⁵Ncèea gaam dàòm khòè zi tcom-tcomsa zi kg'aika di zi, ncèè kò gazi di nqòðan Nqarim koe tòóa hãa zi kò ma t'òè-t'òese ga a, gazi di xu khòè xu máàsean ka khama. ⁶Sarahs khama méé sao ii, ncèè kò Abrahama ba komsana sa, a sa a kò gas ðim x'aiga ba ta ma tcii me. Ncèè qãè gúùan sao kò kúrú a c'èe gúù kaga q'áòkaguèa tama ne sao gha gas di sao cóá sao ii.

⁷Khòè xaoè, gatà iim dàòm cgoa méé xao gazi cgoa kg'òè naka q'ãa, kg'amka tc'áró zi i sa. Gaxao cgoa zi *Nqarim di* aban kg'òèan di di zi

q'òd-kg'ao zi i ke méé xao tcomkuan cgoa qg'óó zi, nxāasega i gha gakhao di còrèan táá cúí gúu kaga xg'àèè ka.

Qāèan kúrú domka xgàrasea ne

⁸Chòd dis ka méé tu wèè tu ga cúí tc'ée, naka thòd-xama-mááku, naka ncàmku qōekua hāa khòè khama ma, naka cg'ómku di ii, naka cg'áré-cg'arese. ⁹Táá méé tu chìbi sa chìbis cgoa suruta kabi guu, kana cóèku sa cóèkuan cgoa kabi guu; igaba méé tu ts'ee-ts'eekg'aikuan cgoa kabi i; gaan domka tu tcièèa hāa ke, nxāasega tu gha ts'ee-ts'eekg'aikuan q'òd ka. ¹⁰**Nqarim dis Tcgāyas ko méé khama a ko máá:**

“Dím wèém ēe gha ko kg'òèan ncàm ba,
a ba a qāè cáman bódè kg'oana ba
méém gam dim tam ba cg'āè gúuan koe hēé
naka kg'áma ba kàa di kg'uiian koe hēéthēé xg'àè.

¹¹Cg'āè gúuan koe méém tcg'oa naka qāèan kúrú,
tòókuan méém qaa naka baa x'āà máá a.

¹²X'aigam di tcg'áa nea ēe tchàno ne koe hàna,
i ko Gam di tceean gane di còrèan komsana,
igaba i X'aigam di kg'áfan
ēe ko cg'āèan kúrú ne cgoa tsééa xg'ae tama,”

témé.

¹³Ncèè qāè gúuan kúrú tu kòo x'āà máá ne i gha dín thòd-thò tu u?

¹⁴Tchànoan kúrú domka tu ga ko xgàrase igaba tu ts'ee-ts'eekg'aièèa hāa. Táá méé tu ēe ne ko bèè sa bèè guu, táá q'aekaguè guu. ¹⁵Igaba méé tu tcáóa tu koe Kreste ba X'aigam iise nxará tcg'óó naka dqòm Me. Ncèè c'ēm khòèm kòo ēe tu úúa hāa nqòdan ka tēè tu u ne méé tu wèè x'aèè ka xoa me tu gha sa kg'ónòsea máána hāa. ¹⁶Igaba méé tu qámsean hēé naka tcomkuan hēéthēé cgoa ncèè gúuan kúrú, naka tchàno tcáóan úúa hāa, nxāasega ne gha dùús wèés cg'āès ēe ne ko gatu ka kg'uis koe, ēe ko Krestem koe qāèèe kg'òèan gatu di ka ko kg'ui ne, saucgae ka. ¹⁷Gatà ma tu ga ko ma qāèan kúrú igaba tu gha xgàrase, ncèè Nqarim kòo tc'ée ne. Ncèes gúú sa cg'áé si i, cg'āèan kúrú domka xgàrasean ka khama. ¹⁸Krestem igabam kò cúí q'oro chibian domka xgàràè khama, tchànom Khòèm iise tchàno tama ne khòè ne domka, Nqarim koem gha nxāasega úú tu u ka. Ncèè kò tc'áróm koe x'ooan koe tcāàè, a Tc'ēm ka kg'òèkaguè ba. ¹⁹Gaam Tc'ēm koe hānasem kò síí ēe qáèèa tc'ēean qáé-nquuan koe xgaa-xgaa. ²⁰Nqari ba xg'ao komsana tama ne di tc'ée e kò ii, ncèem kò Nqari ba **tcóóse ne gha ka** qád tcáóse qāà ne, Nowam ko araka ba tshào x'aèè ka. Cg'oròè ne khòè ne 8 ne cúí nea kò **arakam** koe hàà, a tshàam koe guu a kg'òèkaguè. ²¹I gaa tshàan tcguù-tcguukus dis x'ái si i, ncèeska igaba ko kg'òèkagu tu u sa, cg'áé-q'oom di cg'urian xg'ààa tcg'òós ka tamase, igabas tchànos tcáós dis dtcàrà si i Nqarim koe. X'ooan koe tées Jeso Krestem dis ka i ko kgoara tu u, ²²ncèè nqarikg'ai koe qòda ba,

a ba a kg'áòm x'òàm Nqarim dim xòè koe hàna, moengelean hěé naka tc'ää-cookg'aian hěé naka qarian hěéthěéa Gam dòm q'oo koe hãa.

Nqari ba kg'òèa máá

4 ¹Ncěem ma Kreste ba Gam dim cgàam koe xgàràèa khamaga ma méé tu gatu igaba Gam di tc'ěe-kg'árman úúa, gaam ée cgàam koe xgàràèa hãa ba chibian cgoa xg'ara hãa ke. ²Gaa domkagam ncěeska nqóòmkg'ai di kg'òè-q'ooa ba koe cg'ǎè zi tc'ěe zi khóèan di zi kg'òèa máá tama, a ko Nqarim di ncàmán kg'òèa máá. ³Ncěe nqáeam x'aèm ka tu kò tc'àda x'aèan kg'òè a ko táá zi qhàò zi di ne ko tc'ěe sa kúrú khama, a ko cg'áràn kúrúate, cg'ǎè zi tc'ěe zi hěé, kg'áà nqáésean hěé, nqàrean hěé, kg'áàè ko zi qgái zi koe hãa sa hěé, naka kúrúa mááse di nqárian dqòmán ncěe ntcoe-ntcoesa hěéthěé e. ⁴Gane cgoa tu kò táá xg'ae a tchòà úú tamas kg'òè sa kg'òè domka ne ko are tu u, a ko gatu ka cg'ǎèse kg'ui. ⁵Igaba ne gha ée x'ooan hěé naka kg'òèan hěéthěé xgàran kg'ónòsea máána hãam **Nqarim** koe xoara mááse. ⁶Ncěes gúús domka i qǎè tchòàn ée x'óóa khóèan koe ga thěé xgaa-xgaaèa hãa khama: nxãasega ne gha cgàam koe khóèan khama ma xgàràè, a ne a gha tc'ěem koe Nqarim **ko ma kg'òè** khama ma kg'òè ka.

⁷Wèé zi gúú zi di chòd-q'ooa ne cúú u. Ke tu q'ano-tcáo naka qgóósea hãa, nxãasega tu ga còrè ka. ⁸Wèé zi gúú zi tc'amkg'ai koe méé tu kaisase ncàmku, ncàmku sa ko kái zi chibi zi qàbia tcàà ke. ⁹Qǎèse méé tu x'áéa tu koe hàakaguku, kg'ui úú tamase. ¹⁰Eém ma Nqari ba tááka dàdan cgoa Gam di cgómkuan máà tua hãa khama méé tu ée zi máàku zi qǎèse tséékagu naka c'ěe ne tsééa máá. ¹¹Ncèè c'ěem khóèm kò kg'ui ne méém Nqarim di kg'uiian **ko kg'uim khóèm** khama ma kg'ui. C'ěem khóèm kò tséé ne méém Nqarim máà mea qarian cgoa tséé, nakam gha nxãasega Nqari ba wèé zi qgái zi koe dqòmè, Jeso Krestem koe. Gam koe méé i chòd tamase dqòmkuan hěé naka qarian hěéthěé hãa. Amen.

Dtcòm-kg'ao tsi i domka xgàrasea ne

¹²Ncàm-ncamsa tuè, thòòkas kúrúa bóòkus ée tu ko xgàràès ka méé tu táá arekaguè guu, c'úúa tuas gúús kúrúse cgae tu u kos khama ma. ¹³Igaba méé tu qǎè-tcao, ncèè tu kò ma Krestem kò ma xgàrasea hãa khama ma xgàrases ka, naka tua gha nxãasega Gam dim x'áàm ko x'áise ka kaisase qǎè-tcao. ¹⁴Krestem dim cg'òèm domka tu kò còèè ne tu ts'ee-ts'eekg'aièa hãa, Tc'ěem x'áàm di ba hěé naka Nqarim di ba hěéthěéa gatu koe hãa khama. ¹⁵Igaba ncèè gatu ka c'ěem kò xgàrase ne méém táá cg'òo-kg'ao ba ii, kana ts'áà-kg'ao ba ii, kana cg'ǎè kúrú-kg'ao ba ii, kana khóè ne di gúúan koe káise tcààseam khóè ba ii guu. ¹⁶Gaa domka, Krestem di tsi khóè tsi iise tsi kòo xgàràè ne méé tsi táá saucgae guu, igaba méé tsi ée tsi úúam cg'òèm domka Nqari ba dqòm.

¹⁷X'aè ba hààra hãa, xgàrakuan gha Nqarim dim nquum **di ne** cgoa tshoa-tshoa di ba. A ncèè gatá cgoam kò tshoa-tshoa ne sa gha dùú sa kúrúse ée Nqarim di qǎè tchòàn komsana tama ne koe?

¹⁸ “Ncèè tchànóm khòèm koe i kò qari ii kgoaraèm gha sa, ne ia gha nxāaska ãe Nqari-tcáo tamam khòèm koe hēé naka chìbi-kg'aom koe hēéthēé dùú sa kúrúse?”

¹⁹ Gaa domka méé ne, ãem ma Nqari ba tc'ëea khama ko ma xgàrase ne, tcom-tcomsam Kúrú-kg'ao ba mààse, naka nea qāèan kúrú cgoa *còoka qòò*.

Cg'aré-cg'aresea ne (5:1-14)

Kaia ne hēé naka cg'aré ne hēéthēé e

5 ¹Eë gatu xg'aeku koe *hàna xu* kaia xu *kerekes di xu* cgoar ko kg'ui, ncēer tíí thēé gaxu ka c'ëe ii ra. Krestem di xgàrasean tçgáia te cgoa bòda hāa a gha gataga ncēe ko hàà x'áíè x'áàn koe hāa ra, ²*domkar ko kaisase dtcàrà xao o a ko máá*: Ghùu zi Nqarim di zi xao kòre. Q'òé zi, qaase i ko domka tamase, igaba tcáóa xao di tc'ëean domka, ãem ma Nqari ba ncàma hāa khama. Ncēes tséé sa kúrúan di ncàman úúa hāase méé xao kúrú si, surutan qaa tamase. ³Ghùu zi ãe tshàu q'ooa xao koe tcāàèa hāa, kòre zi xao gha ka zi koe, méé xao táá x'aigan kúrúse guu, igaba méé xao gazi koe x'ái sa ii. ⁴Naka xaoa gha nxāasega, ãem ko kaiam Kòre-kg'ao ba hàà ne, kaà tama x'áàn dis cábá sa hòò.

⁵Gatu ãe cg'aré tu méé tu gataga ãe xu kaia xu komsana. Wèéa tu ga méé tu cg'aré-cg'aresean cgoa hāakaguse gatu ka c'ëea ne koe,

“Nqari ba ko ãe ko bódse ne xguì

igabam ko ãe ko cg'aré-cg'arese ne cgòmkuan máá” ke.

⁶Gaa domka méé tu cg'aré-cg'arese Nqarim dim kaiam x'òàm dòm q'oo koe, nxāasegam gha hààkom x'aèm ka ghùu tu u ke. ⁷Gatu di káise tc'ëe-tc'ëesean wèé ga Gam koe ncemea úú, gatu cgoam tchòà úúa ke.

⁸Gqóósea méé tu hāa naka kókòda hāa. Gatu dim cg'òo-kg'aom dxāwa ba ko kg'aekom gàm khama ma caate ke, a ko c'ëe khóèan qaa, kg'oom gha a. ⁹Xguì me naka dtcòmman koe qarika téé, q'ana tu hāa, ne gatu ka c'ëe ne nqóòmkg'ai koe gatà ii xgàrasean koe hàna hāa ke.

¹⁰Eë tu xòm x'aè-coan xgàrasea hāa qāá koem gha Nqarim wèé cgòmkuan di ba, ncēe ko Gam di chòò tama x'áàn koe Jeso Krestem koe tciia úú tu u ba, Gam ka kàba-kàba tu u, a gha kúrú tu u tu qari, a qarika téé, tchànose. ¹¹Qarian méé i Gam koe chòò tamase hāa. Amen.

Còò di zi tsgámkaguku zi

¹²Silefanom^b di hùikuan cgoar xòmse góá máá tua hāa, ncēer ko máá tcom-tcomsam qōe me e témé ba. Korè tu ur ko a ko nxàea tseegukagu, ncēea Nqarim dis cgòmkuus tseegu di si i sa. Gaas koe qarika téé.

b 5:12 *Silefano* - Silefanom di c'ëe cg'òèa nea Silase e.

¹³Eẽ Babilone koe hãnas ***kerekes***, ncẽe gatu cgoa nxará tcg'òóèa sa ko tsgám tu u, me ko gataga thée tirim cóám Mareko ba tsgám tu u.

¹⁴Tsgámku tu x'obèkus ncàmkuan dis cgoa.

Tòókuan méé i gatu wèè tu cgoa hãa, Krestem koe hãna tu.